

Zeitschrift: Akzent : Magazin für Kultur und Gesellschaft
Herausgeber: Pro Senectute Basel-Stadt
Band: - (2010)
Heft: 1: Schwerpunkt Feuerbräuche

Artikel: D Eerscht-Augschten - und Silveschter-Fyyrwärgg : wenn zBasel d
Rageete stygge...
Autor: Miville-Seiler, Carl
DOI: <https://doi.org/10.5169/seals-842827>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 30.03.2025

ETH-Bibliothek Zürich, E-Periodica, <https://www.e-periodica.ch>

D Eerscht-Augschten – und Silveschter-Fyyrwärgg

Wenn z Basel d Rageete stygge...



Fyyr als Folklore? Mit Kienbäase wie z Lieschtel und mit fyyrige Rundummeli, wo me vom ene Hubel uus in d Nacht schiesst, kenne mer nit diene. Y waiss au numme vo zwai brennige Schyterbyygene: dären am 1. Augschten uff em Bruederholz und dären an dr Bundesfyyr vo de Bettiger uff «Zwischebäärg». Aber drey groossi offizielli Fyyrwärgg gniesse mer scho: am 31. Haimoonet (Juli) am Rhyy, am 1. Augschten uff em Bruederholz und am Silveschter, au wider am Rhyy.

Bsunders sympathisch find ych d Bundesfyyr uff dr braite Matten unden an dr Batterie und em Wasserturm, Joor fir Joor am 1. Augschte, duregiert vom ene Komitee, wo die Neutrale Quartierverain Gundeldingen und Bruederholz drzuegheere. Doo heert me scheeni Muusig und haiteri Joodelgläng, me freut sich iber folkloristischi Darbietigen und heert e Reed

vom jeewyylige Regierigspresidänt. D Lyt sitzen im Graas und hänn s gmietlig, vyl Familie mit de Kinder. Zem Schluss brennt e Holzbyygi, und s stygt e gfellig Fyyrwärgg, wo alli Freud draa hänn.

Ane 1889 het dr Bundesroot dr Eerscht Augschten als offizielle Bundesfyyrdaag fixiert. Dasch aber znäggscht emol no lang kai Grund gsi zem nit schaffen. Eerscht 1994 isch dä Daag en aarbetsfrye Fyyrtig worde. Doo reedet dr Bundespresidänt am Radio und am TV, und am achi zoobe lyten alli Kirchgloggen im Land. Syt 1942 findet au en aidgnessischi Bundesfyyr uff em Rütli statt, duregiert vo dr Schwyzerrische Gmainnizige Gsellschaft.

Z Basel fyyre mer dä Daag in zwai Dail: am eerschten Augschten uff em Bruederholz und – syt ane 1993 – mit eme groosse Volggfescht am Vorooben an de Rhyyuufer. Doo vergniege sich wyt iber 100'000 Lyt an vyl ad hoc-Baizen- und Ständ und an sportlige wie au anderen Unterhaltigen uff em Wasser. Am Aend git s e Riise-Fyyrwärgg, aber au dr Fischerclub brennt e glai Fyyrwärgg ab, und mit em «Stäärnelyyche» kunnt vyl Gäld zämme fir s Hilfswärgg Fairmed. Drait wird s Ganz vom Lotteriefonds und vo andere guete Greft.

Au dr Silveschteroobe wird feschtlig und groosszig begange. Zem en eerschten und bsinnlige Dail finde sich vyl Lyt uff em Minschterplatz. Si stoosse mit enander aa, gratuliere Bikannten und Unbikannten, und si fille fir e Breedig loose s Minschter bis uff dr letscht Platz. Dr ander Dail findet au wider am Rhyy statt, wie an dr Bundesfyyr und au wider mit eme groossartige Fyyrwärgg, gstiftet vom Ex-Byjoutier und -Uurehändler Michèle Parini und andere Sponsore. Arrangiert wird das Fyyrwärgg syt vyle Joor vo dr Firma Bugano AG uff zwai Rhyyschiff, und s isch interessant, was fir e Rolle hit bi soom ene Zauber d Elektronik spiilt. Drnäabe git s bim Café Spitz und under dr Johanniterbrugg Gliewyy, und s sinn wider eppe 120'000 Bsuecheren und Bsuecher, wo an de Rhyyuufer bin ere Vylzaal vo Verpfläggismeeglikaiten e Druggede bilde.

Han y e Fyyrwärgg vergässe? Hejoo: das vo de Riechemer an dr Bundesfyyr im Saaresy-Pargg. Soovyl zem «fyyrfreudige Basel».

Carl Miville Seiler